

Na osnovu člana 16. stav 4. Zakona o Vladi Zeničko-dobojskog kantona – Prečišćen tekst („Službene novine Zeničko-dobojskog kantona“, broj: 7/10), a u skladu sa Programom utroška budžetskih sredstava u 2017. godini (Subvencije privrednim preduzećima i poduzetnicima), usvojenim Zaključkom Vlade Zeničko-dobojskog kantona, broj: 02-14-10103/17 od 03.07.2017. godine, na prijedlog Ministarstva za privredu, Vlada Zeničko-dobojskog kantona, na 104. sjednici, održanoj 27.07.2017. godine, d o n o s i

ZAKLJUČAK

I.

Daje se saglasnost na Uputstvo o postupku i kriterijima za odobravanje i dodjelu (refundiranje) sredstava poticaja namijenjenih regresiranju kamata na investicijske kredite, koji čini sastavni dio ovog Zaključka.

II.

Za realizaciju poticaja iz tačke I. zadužuje se Ministarstvo za privredu, koje će donijeti sve potrebne akte i imenovati komisiju za provođenje propisanog postupka.

III.

Zaključak stupa na snagu danom donošenja i objavit će se u „Službenim novinama Zeničko-dobojskog kantona“.

Broj: 02-14-10980/17.

Datum, 27.07.2017. godine

Zenica

PREMIJER

Miralem Galijašević

DOSTAVLJENO:

1x Ministarstvo za privredu,

1x Ministarstvo finansija,

1x „Službene novine Zeničko-dobojskog kantona“,

1x a/a.



UPUTSTVO
O POSTUPKU I KRITERIJIMA
ZA ODOBRAVANJE I DODJELU (REFUNDIRANJE) SREDSTAVA POTICAJA
NAMIJENJENIH REGRESIRANJU KAMATA NA INVESTICIJSKE KREDITE

Zenica, juli 2017. godine

1. IZVORI I NAMJENA POTICAJNIH SREDSTAVA – REGRESA

Sredstva za regresiranje kamata obezbjeđuju se iz Budžeta Zeničko-dobojskog kantona, planiraju Programom utroška sredstava u Ministarstvu za privredu za tekuću godinu u kojoj se vrši dodjela poticaja i refundacija.

Radi obavještanja korisnika o mogućnostima dobivanja sredstava poticaja odluka se objavljuje u sredstvima javnog informiranja u formi Javnog poziva za dodjelu poticajnih sredstava i na oficijelnoj web stranici Kantona.

U cilju intenziviranja investicija u oblasti poizvodnih djelatnosti, a samim tim zapošljavanja i razvoja, Vlada Kantona će, radi rasterećenja i podrške investitoru u početnim fazama realizacije investicija, regresirati dio uplaćenih kamata na odobrene investicijske kredite privrednim subjektima registriranim u Zeničko-dobojskom kantonu, ukoliko svoju investiciju realiziraju u Zeničko-dobojskom kantonu na temelju kredita odobrenog od strane bilo koje od komercijalnih banaka registriranih u Bosni i Hercegovini.

Regresiranje kamata se neće odobriti za kredite ili dio kredita koji su namijenjeni reprogramiranju drugih kredita.

2. INVESTICIJE I KORISNIK SREDSTAVA

Pod proizvodnom investicijom, u duhu ovih kriterija, podrazumjeva se isključivo:

- kupovina, izgradnja, uređenje i proširenje objekata za obavljanje registrovane proizvodne djelatnosti iz područja D (ili C po novom) – Prerađivačka industrija (Standardna klasifikacija djelatnosti),
- kupovina sredstava za rad, opreme ili pojedinih dijelova opreme, kojom se obezbjeđuju uslovi za obavljanje registrovane proizvodne djelatnosti iz područja D (ili C po novom) – Prerađivačka industrija (Standardna klasifikacija djelatnosti),
- obezbjeđenje osnovnih sredstava, za obavljanje registrovane proizvodne djelatnosti iz područja D (ili C po novom) – Prerađivačka industrija (Standardna klasifikacija djelatnosti).

Pravo na regresiranje kamata imaju privredni subjekti koji su potpisali investicijski ugovor nakon **01.01.2015.** godine i ispunjavaju uslove prema kriterijima ovog poticaja.

Pravo na korištenje sredstava poticaja imaju isključivo privredni subjekti registrirani u Zeničko-dobojskom kantonu, ukoliko svoju investiciju realiziraju u Zeničko-dobojskom kantonu na temelju kredita odobrenog od strane bilo koje komercijalne banke registrirane u Bosni i Hercegovini, ukoliko je najniži odobreni iznos tog kredita **50.000,00 KM**.

Pod privrednim subjektima male privrede podrazumijevaju se privredna društva (MSP - po definiciji) i subjekti iz obrtničkih djelatnosti, koji se bave proizvodnom djelatnošću iz područja D (ili C po novom) – Prerađivačka industrija (Standardna klasifikacija djelatnosti).

U skladu sa Zakonom o poticanju male privrede ("Službene novine Zeničko-dobojskog kantona", broj: 7/16), malu privredu čine subjekti male privrede, fizička i pravna lica, koja trajno obavljaju zakonom dozvoljene djelatnosti radi ostvarivanja dohotka odnosno dobiti, registrovani kod nadležnog organa, bez obzira na oblik organizovanja i koji:

- a) su samostalni u poslovanju,
- b) zapošljavaju prosječno godišnje manje od 250 lica, i
- c) ostvaruju godišnji prihod manji od 97.500.000,00 KM i/ili čiji je bilans stanja manji od 84.000.000,00 KM.

3. IZNOS POTICAJNIH SREDSTAVA

Vlada Kantona preuzima finansiranje dijela uplaćenih kamata u iznosu koji će nominalno iznositi **najviše do 30.000,00 KM** po godini, te najduže u periodu od prve tri godine realizacije kredita –

investicije, (po javnom pozivu) čime će maksimalni iznos sredstava odobren po jednom korisniku biti **90.000,00 KM**.

Sredstva poticaja će se odobravati za investicijske kredite čija je kamata 4,5 i više procenata. Osnovu za izračunavanje i dodjelu (refundaciju) sredstava poticaja namjenjenih regresiranju kamata na investicijske kredite čini ukupan iznos sredstava koja je Investitor uložio za realizaciju investicije putem komercijalne banke, te za koju obezbjedi nedvosmisleni dokumentaciju iz koje se može zaključiti da su sredstva iskorištena isključivo za realizaciju investicijskih aktivnosti prema tački 2. ovog Uputstva.

Pri utvrđivanju iznosa godišnjeg poticaja primjenit će se stopa visine **3%** od predhodno i nedvosmisleno utvrđenog utroška (investicije).

Investitor gubi pravo korištenja poticaja u drugoj i trećoj godini, u slučaju da Komisija utvrdi bilo kakav vid otuđenja sredstava obezbjeđenih u postupku realizacije investicije.

4. ZAHTJEV ZA ODOBRAVANJE POTICAJNIH SREDSTAVA

Uredan Zahtjev za odobravanje poticajnih sredstava – regresa investitor dostavlja Ministarstvu za privredu.

Uz Zahtjev investitor dostavlja **original ili ovjerenu kopiju**:

- Bilansa stanja i Bilansa uspjeha za prethodnu godinu;
- Spisk uposlenih izdat od strane nadležnog organa, ne starije od 90 dana u odnosu na dan podnošenja zahtjeva;
- Odluke o odobravanju kredita komercijalne banke,
- Odobrenja za obavljanje djelatnosti ili odgovarajući akt nadležnog inspeksijskog organa,
- Dokumenta iz kojih se nedvosmisleno može zaključiti da se kreditna sredstva koriste za investiranje prema tački 2. ovog Uputstva,
- Uplatnice (ili drugog validnog dokaza o uplati) kamata i rata kredita prema planu otplate, za period do dana objave javnog poziva.
- Upotrebne dozvole za kupljena sredstva rada i / ili izgrađeni objekat, izdate od nadležnog organa,
- Uvjerenja o uredno izmirenim indirektnim porezima - ne starija od 90 dana od dana podnošenja zahtjeva,
- Uvjerenja o uredno izmirenim javnim prihodima, ne starija od 90 dana od dana podnošenja zahtjeva,
- Original ili ovjerenu kopiju uvjerenja o uredno izmirenim finansijskim obavezama prema Budžetu Zeničko-dobojskog kantona;
- Uvjerenje Komercijalne banke da je žiro račun izvoznika aktivan, ne starije od 90 dana u odnosu na dan podnošenja zahtjeva.

5. KOMISIJSKA OCJENA

Komisiju za ocjenu ispunjenja uvjeta i kriterija za dodjelu sredstava imenuje i razrješava ministar Ministarstvu za privredu. Za svoj rad ova komisija odgovara ministru Ministarstva za privredu.

Komisija razmatra Zahtjeve investitora poštujući hronologiju prijema istih na protokolu Ministarstva, odnosno Vlade Zeničko-dobojskog kantona, te cijeni ispunjenost uvjeta i kriterija za odobravanje sredstava – regresa.

Izvještaj, Komisija dostavlja ministru Ministarstva za privredu, koji će biti objavljen na web stranici Vlade Kantona.

6. ODOBRAVANJE SREDSTAVA – REGRESA

Na osnovu Izvještaja o ocjeni i mišljenja Komisije, Ministarstvo za privredu predlaže Vladi Kantona donošenje Odluke o odobravanju poticajnih sredstava – regresa.

Pojedinačne odluke Vlada donosi shodno raspoloživim sredstvima za tekuću godinu, a prednost u odobravanju sredstva poticaja ima onaj korisnik koji u posljednje tri godine nije koristio poticajna sredstva od strane Ministarstva.

Korisnici poticaja Ministarstva u prethodne tri godine eventualno će biti rangirani zavisno od visine dobijenih poticajnih sredstava.

7. REFUNDACIJA SREDSTAVA – REALIZACIJA POTICAJA

Na osnovu Odluke o odobravanju sredstava Ministarstvo za privredu podnosi Nalog za isplatu Ministarstvu finansija.

MINISTAR

Zlatko Jelić dipl.oec.